

15 OCT 2001

PNB-LABUR

PNB AKAN TAMBAH PELABURAN DALAM KERTAS BUKAN EKUITI

KUALA LUMPUR, 15 Okt (Bernama) -- Pengurusan dana amanah nasional, Permodalan Nasional Bhd (PNB) akan meningkatkan tahap pelaburannya dalam kertas bukan ekuiti dengan pengenalan skim unit saham amanah yang baru esok, kata ketua eksekutif kumpulan Datuk Hamad Kama Piah Che Othman.

Buat masa ini di bawah skim sedia ada, PNB melabur 90 peratus daripada dana saham amanahnya dalam pegangan pasaran ekuiti.

Menurut Hamad Kama Piah, pasaran bukan ekuiti yang telah ditinjau oleh PNB termasuk pasaran bon dan pasaran wang yang menyediakan pulangan yang stabil. (Mengikuti amalan biasa, kertas bukan ekuiti yang kurang berisiko dipanggil pelaburan pulangan tetap.)

Beliau berkata demikian sempena hari kualiti PNB di sini hari ini.

"Biasanya, kami melabur dengan banyaknya dalam aset ekuiti dan apabila pasaran lemah, ia mempengaruhi pulangan," kata beliau.

Beliau berkata PNB berharap dengan strategi baru itu, ia boleh mengimbangkan pulangan ekuiti dan bukan ekuiti serta mengwujudkan portfolio yang lebih kukuh.

Skim baru yang merupakan skim kelapan pilihan saham amanah PNB akan dilancarkan oleh Perdana Menteri Datuk Seri Mahathir Mohamad.

Hamad Kama Piah berkata skim itu dibuka kepada semua warga Malaysia berumur 18 tahun dan ke atas.

Mengenai kemungkinan ramai akan mempersoalkan keputusan PNB untuk memulakan skim baru itu dalam persekitaran pasaran yang menurun, Hamad Kama Piah berkata perbadanan itu merasakan masanya bersesuaian "memandangkan dana boleh diperolehi (saiz sasaran) pada harga tawaran yang lebih rendah".

"Sebagai peserta jangka panjang, kami percaya sekarang merupakan masa yang tepat bagi kami untuk memperkenalkan skim baru," kata beliau.

Beliau berkata saham amanah yang baru itu bersaiz terhad dan ia akan ditawarkan atas dasar "siapa cepat dia dapat".-- BERNAMA

NN SEL NHD